

四庫全書

集部

欽定四庫全書

南陽集卷十四

宋 韓維 撰

絕句

春貼子皇帝閣六首

和氣生金殿微風轉畫旗年年好春色先是帝家知
迎氣來歸昨宜春祝降祥皇心勤治切應喜寸陰長
醇醴浮金斝柔蔬釘玉盤嘗新兼介壽齊奉兩宮歡

晝漏新添刻春寒早放班恩隨寬大詔一日徧人間
晴日漸消宮瓦雪和風微散御爐烟千官拜舞皇恩罷
綵勝金幡下九天

早鶯啼滑知寒薄午馬休遲覺晝長四海歡康幾務暇
簫韶時奉萬年觴

太皇太后閣六首

位歷三朝重風行四海深坐將仁厚意潛助發生心
銅甌消殘凍朱樓拂早霞傳聲回步輦來賞小桃花

視膳回天仗含飴樂聖辰定應彤管筆書美繫王春

鏤成寶字題宮戶剪出名花趁御筵人世不知春色早
忽驚歌吹下中天

長樂鐘殘寶殿開鳴梢移仗問安來欲知純孝通天地
和氣氤氲遶御盃

殘冰未放溝聲滑小雨頻催柳色新晝漏漸長無一事
坐披黃老味天真

太后閣六首

正閨成王化開宮奉母儀身當四海養壽祝萬年期
玉律生陽早金鋪上日遲枝間雙鵲語應是報春祺
平曉開朱戶輕寒御練衣宮童移鈿扇慶壽早朝歸
金花鏤勝隨春燕綵仗縈絲逐土牛迎得韶華入中禁
和風次第遍神州

綵仗朝來散玉京綺窓新網結初晴靜呼宮女教調曲
閒引皇孫看學行

九奏清新稱玉笋八珍和旨奉蘭羞湏知天子娛親意

不為乘春事燕游

皇后閣五首

后德侔姬國
嬪風協舜家
進賢陽為長
修教月增華
春色平明到
微風弄綵旂
稍回宮柳弱
更助辟椒溫
暖日暉暉動
清渠泱泱流
六宮修歲事
拂拭採桑鉤
紫蘭紅蓼簇
春盤曉逐金
壺下太官朝
遍三宮歸已
晚
日華明麗雪
消殘

葭灰已逐陽和動
繡縷初隨日景加
欲助君王修儉德

不將宮樣織新花

夫人閣四首

臘雪餘香徑朝暉上綺夢翠生蘭蕙色和入筦絃聲
重錦褰粧幕輕羅換舞衣釵頭雙燕子先向社前飛
薄暖正當挑菜日輕陰漸變養花天君王勤政稀游幸
院院相過理筦絃

宮娃拂曉已催班拜謝春旂列御前不待東風報花信
紅酥綵縷閨芳妍

寄大覺禪師

聞住金山最上方
江雲飄檻海風涼
何時乞得東南守
重拂塵衣入道場

照禪師久欲一見
比至汝則已遊矣
因題廣惠高僧寂
寞空塵坐古寺悲
涼足野風道在豈
須煩目擊亭前雙
柏自蔥蔥

酴醾

平生為愛此香濃
仰面常迎落架風
每至春歸有遺恨

典刑猶在酒杯中

戲示程正叔范彛叟時正叔自洛中過訪

曲肱飲水程夫子宴坐燒香范使君顧我未能忘外樂

綠尊紅芰對朝曛

曲肱飲水一作閉門讀易宴坐燒香一作隱几燒香朝曛一作斜曛

和述古河陽感懷之作

大河雄勝昔常遊擁節題詩為少留我亦華顛無用者

碧嵩清潁是歸頭

贈曹大夫三絕

落落明珠駭暗投
知君所得在無求
直須言下通非句
識取澄潭皎潔秋

竊祿偷安到白頭
一聞高韻使人羞
如今便欲歸休去
已愧遲君八九秋

勢利驅人去若流
君才六十便歸休
歸時不及家無有
但問松安竹健不

湖上招晏叔

故人旌旆鎮隣城
未奏驪歌已愴情
莫為炎蒸慵命駕

綠荷紅芰水風清

送張七元構仕亳州

蕭條平馬逐飛蓬
回首園林平露中
政事文章君得法
如今太守古人風

和子華兄寄酒走筆

開壺綠酒金英滿
走筆彫章錦段成
不假陶潛籬下望
更判五斗滌煩醒

紅薇花

杏梅成實夏陰濃
波面繁花刺眼紅
莫為春歸減歡興
共將絃管樂薰風

和王詹叔寄彭年四首

紛紛聲裏滿埃塵
一聽除書耳目新
清世未能忘薄祿
官曹猶得作閒人

斷瓢踈苦入提携
濁酒徐傾鱸縷肥
雨後碧山來爽氣
松間明月尚清輝

層樓飛觀壑溪流
縹緲當從海上求
病間體輕塵慮靜

好追仙子御風游

一曲清琴滿架書萬鍾於我亦分銖他年欲作林泉計
為問山前有地無

和太素雙頭牡丹兼呈子華

羣英日零謝並蒂發奇芳願以附驛使為兄壽且昌

某伏蒙寄示五言二韻詩軌次韻上呈聊以見
志

尚不求真語何能計妄言且饒只麼會猶是弄精魂

卞仲謀八老會

同榜同僚同里客斑毛素髮入華筵三杯耳熱歌聲發
猶喜歡情似少年

招彞叟厚之飲臺上花間

恍然身世出塵心香靄祇園地布金秉燭聽歌不知醉
夜深清露滿衣襟

子華兄生日五首

秀眉華髮貌安和五福於今得最多諸聖共忘心外境

八仙同入飲中歌

池面和風麗稍開翠條芳甲滿春臺笙歌競奏長生曲
兄弟華顛對舉杯

萱甲微抽碧玉簪已驚花艷動筠籃便須行樂迎東律
莫為回神滯北庵

柳陰散釋真陽艷妄慮消除至道冥浮世短長何足道
須知時節在明星

白鶴羣飛散作陰方春膏雨一犁深只知萬物含芳潤

誰識清通造化心

蒙以詩惠水晶繪次韻答謝

凝如寶匣開明鏡散逐金刀落素絲
我為南來多內熱徑呼玉筍盡三巵

遊北園輒成二頌呈芳公長老

萬法都來一道場游行何處不真常
臨風不用提玄旨翠竹森森自短長

青山隱約林端見碧水逶迤竹下來
芳草落花無朕迹

與君親到北園回

展江亭海棠四首

占盡人間麗與華
白頭判得醉流霞
誰將法錦翻新樣
紅綠裝成遍地花

昔年曾到蜀江頭
絕豔牽心幾十秋
今日攔邊見顏色
夢魂不復過西州

紅糝粧條嫋嫋長
人間不合有花香

此花無香

千觴未足酬

佳麗回首東風更斷腸

人避寒風與暖曦
年年長此探花期
如今太守尤珍愛
只許官娃帶一枝

和杜孝錫展江亭三首

斜日低雲動水光
偶尋佳處閱羣芳
城闌不隔和風度
吹過千花百草香

驚鷺飛鳴避畫橈
遊人笑語過朱橋
賈家園裏花應謝
綠遍牆頭野杏梢

世情未免歌紅粉
道韻無妨寄白雲
歸路看花應更好

林間明月涌金杯

和景純栽松

芳根出澗底秀木依牆東
莫顧一時好當觀三世空
論堅莫如松言脆莫如葱
堅脆卒同盡無盡無如翁

寄太素

雪竹風松絕點塵
邪陰消盡火成輪
時人不識先生意
喚作人間無事翁

黃蓮花

淺白輕黃兩未分飛來人世作朝雲天教細雨常遮護
留得清香數日聞

只將蕭洒與溫醇敵盡千花百草春欲賦清詩寫深願
却疑潛笑白頭人

一水盈盈獨立時六銖衣薄透冰肌臨川已沒龍丘遠
辜負芳妍乞好祠

聞堯叟遊展江亭

西亭不覺又春風弱柳微波四面中更欲煩君亭下看

海棠枝上淺深紅

景仁雨中同遊南園

暖日催花落夕曛輕雷一夜變重雲
安與少滯無多怪
湔雨慳風自古聞

宿醉厭厭曉尚曛
卷簾清思滿風雲
久嫌日暖撩人困
却喜花香帶雨聞

累日不到西園瑞香忽已爛熳

錦官翻樣出新機
淺綠深紅各自宜
不是東風送香氣

幽花落盡有誰知

和子華對雨有感

小桃零亂逐東風
繁杏枝梢次第紅
把酒直須連日看
春光一半已成空

雪白朱紅已萬枝
年年長恨失花期
莫嗟飛雨淹游棹
却賴春寒發較遲

病起呈景仁

卧病經旬獨掩門
名園空想綠陰繁
牡丹時節重來會

嘗記公非醉後言

新得小石呈景仁

泥沙洗盡太湖波狀有嵌崟勢亦我可笑尚平游五嶽
不如坐視一拳多

芙蓉五絕呈景仁

堂前堂後盡芙蓉晴日烘開萬朶紅不把一樽酬勝賞
忍看憔悴落霜風

小霑清露細搖風養得新花次第紅客至莫教樽酒燥

朝吟夕賞未知窮

少年嘗記作西遊
尤藥奇葩夾道秋
今日家園開爛熳
恍疑身在蜀江頭

不辭晨起立秋風
為愛濃芳露滿叢
若比洛陽花盛品
萬枝開遍瑞雲紅

携觴日日遶珍叢
未必歡情盡醉中
却怕後時無意思
殺風景似范蒙翁

君俞惠詩覓洛中所得大金菊輒次韻酬二篇

繁英浮動滿烟葉愛重不減雙南金陶公此興亦不淺
聊贈翠茁酬高吟

禪老心真異衆心不緣歌舞費黃金春芳落盡慵開眼
豫乞寒花伴苦吟

百門義呈君俞輒成短章

一微塵上百門成空裏花飛谷裏鳴海印元來君自有
聊將黃葉止啼聲

新作西北門樓

俗六香
菜門

赤白崔嵬晚照間
投閒時復一躋攀
時平守望皆無用
添得清秋數點山

晚過湖上登城樓汎小舟歸

蛩響漸依堦砌下
螢光亂出草萊間
炎蒸散盡人輕健
從此籃輿數往還

綠水逶迤城兩面
清風搖動稻千畦
獨乘幽興携樽酒
小艇歸時月已低

奉和君俞以子華古德頌見示

百尺竿頭進步人隨緣偶物莫非真君看日用如何討
即此空身是法身

杜君章家賦海棠二首

長條無風亦自動繁艷著雨更相宜少陵不奈被花惱
終日顛狂覓酒卮

濯錦江頭千萬枝當年未解惜芳菲今朝得向君家見
不怕春寒雨濕衣

和冲老雪頌

採絮瓊飛曉尚飄
平吞六合蔽層霄
從來不打禾山鼓
且向樽前看綠腰

充夫垂示佳駕輒次二韻為謝

橫笛能為水龍響
清歌不放綵雲飛
知君未盡杯中興
故折紅芳贈醉歸

和太素密杏

甘滋不假蜂房取
美種疑隨鶴馭來
方朔偷桃徒語爾
安期食棗足珍哉

聞太素絕食飲水頗甚清羸以詩見招

曲肱飲水歸寒士服氣休糧號道人顧我非寒亦非道
好來相伴祭身神

蒙惠拄杖及詩依韻奉答

藤枝既老解縱橫禪老因何解道情識取箇中無把捉
眼前瓦礫是瑤瓊

因題象罔亭榜呈太素

一顆圓明不欠虧胡來胡現大鈞知如今象罔渾無用

榜樣從教作世師

遊象罔亭偶成二絕

泛盡溪流數曲清
竹陰開處見新亭
山翁不會題牌意
猶守枯枝看道經

竹色隱波流不去
蓮香浮坐斷還聞
誅茆結宇才方丈
占盡清風與白雲

太素雪中惠小桃

細雪繁飄遠近來
三冬佳氣一朝回
莫嫌天上瓊花晚

元待人間粉艷開

奉答祖印喜雪二頌

細逐流風徧大田
皚然一色絕中邊
空生慣識岩中鏡
何似天花亂墜年

久旱終能不失時
田家喜氣吐虹霓
龐公昔日曾垂語
資福今朝更指迷

對雪偶成三頌呈芳公長老兼簡收貴二上人
空生去後花飛絕
龐老行時雪落頻
有句無言空不會

夜寒紅燄一爐香

聞君鼎足話無生說盡無生及有生
幾日西郊回杖錫
小牕同聽竹風聲

再賦頌二首

兩膝雙盤一足垂
歷然賓主席間儀
惟應露柱方能識
只恐仙陀也不知

陽景朝來釋凍澌
水邊林下好追隨
靈山一會何曾散
莫學時人語別離

讀白樂天傳及文集

才高文膽富詩名感物傷時動有情不識無生真自體
一塵才遣一塵生

直道危言自古難忠賢常困佞邪安興王賞諫非無法
却為貪令自擇官

仲尼飢餓顏回天此意誰能問大鈞何事香山白居士
每嗟衰老亦言貧

和提刑千葉梅

層層玉葉黃金蘂漏洩天香與世人間寂未須嗟失地
年年長冠百花春

擢玉自成超俗格施朱不學八時粧莫將羅幕輕遮護
從放樽前自在香

次韻答提刑王朝奉席上看梅見貽

誠已從來不問天肯將衰白慕華軒調羹豈是山翁事
只合看花對酒樽

和微之遊湖春夏秋冬四絕

冰散玉珂微弄暖
梅含金粉巧矜新
道人不管年光逝
貪作詩章等待人

花邊鷺立紅雲裏
林下人行翠幄中
炎暑吾今知所避

全家移入廣寒宮

屢居展
江亭

敗荷衰折水西流
極目清光好放舟
幸有主人頻卜畫
肯同俗子更悲秋

畫舫新成水拍堤
悲絲急管韻參差
吟風嘯月年年事
未省曾經興盡時

衆舉毗盧作僧正以詩勉之

庵前誰爲子磨磚休把真心作靜看了得諸塵非異物
披毛帶角也何難

和微之飲楊路分家聽琵琶

酒熟梅香臘後天春鶯巧囀忽當筵共啖白傳辛勤甚
萬喚千呼始上船

遇酒逢春觸處春白頭相視若天倫須知丞相官儀重
不及琳宮自在人

再和堯夫同前

朱絃四十昔嘗聞，藝不論多貴絕倫。
少損新聲放平淡，

免教醉殺白頭人。

是夕劇飲歡甚

教得新聲十二絃，每逢嘉客便開筵。
春湖水綠花爭發，好引紅粧上畫舡。

再和堯夫欲借琵琶妓

畫舡西去水成鄉，玉管朱絃出上方。
衰病不須多酌我，次公非酒亦能狂。

謝公故事常携妓白傳高年自唱歌更假紅粧知有意
欲添尊酒十分多

閒居思湖上

遠泛每思隨雁鶩深居半是避杯觥官閒日永無餘事
卧聽朱絃教曲成

次韻答微之

空門欲問君何得減色終非我所能岑寂歡狂均有待
無相與處是良朋

致仕後次韻答張念七

潁水箕山一老生，漠然心境兩俱平。
倘來物外皆如寄，

腰底懸金臂掛纓。

腰懸金臂掛纓均外物之倘來寄也

一榻高眠只自思，累朝榮宦竟何為。
顛毛白盡朱顏改，

惟有丹心似舊時。

曾通直見惠風琴

剡竹紉絲匠意深，泠然終日自成音。
吾君方急民財阜，

好助薰風入舜琴。

玉汝惠貓頭笋

漢臣問鵬曾遊地

笋來長沙

臘祭迎貓始出林

始出林則解

解

籀光先凝片玉含甘珍重等兼金

庵中睡起五頌寄海印長老

閒窓日射寒松影枕上風傳過雁聲
夢境覺來無一際不勞唇齒話無生

四風標韻出風塵高下雖殊一色均為我
終朝談實相參差庭柏敞精神

剡竹紉絲雜短長誰教曲折號宮商自從眠處知消息
終日笙歌是道場


飯後西堂百步行困來合眼是無營從生至老非他物
道著如今已是情

火衰水劣病餘身未散虛空一聚塵更欲強招年少客
折花同賞夢中春

和玉汝贈收上人

道得都來是八成聖無功用已非靈憑君諦視丹霞路

依舊雲山點點青



南陽集卷十四

欽定四庫全書

集部

南陽集卷十五至
七

詳校官庶吉士臣范逢恩

檢討臣何思鈞覆勘

總校官進士臣朱鈐

校對官待詔臣胡士震

謄錄監生臣梁朝鼎

欽定四庫全書

南陽集卷十五

宋 韓維 撰

內制

皇太后冊文任門下侍郎日撰

維元祐二年歲次丁卯八月庚辰朔五日甲申嗣皇帝

臣御名謹稽首再拜言曰臣聞鴻名顯號尊二儀而後爲

大豐祿備養悉四海而後爲至夫惟厚德積載則極尊

靡元純佑流澤則多福無疆愛敬盡於孝治情文達於
禮本卓哉煌乎非甚盛德何以兼大名至養之美哉本
朝受命溥將隆化熙洽惟皇業之昌熾由聖母之輔治
陰教修而格恥儉德懷於永圖遐邇一體中外禔福迨
於冲眇續承洪緒母儀崇訓實賴慈寶坤元資生溥及
品物天地並況華夏樂推率籲衆心不勝大願謹遣攝
太尉某官攝司徒某官奉玉冊金寶上尊號曰皇太后
恭惟皇太后秉德聖淑處靜存專徽音邁於三母柔範

形於四表上當天心則紛綸歲蕤應誠之景貺下符民
願則謳謠鼓舞僊志之祀俗敬奉丕冊光顯隆祚豈特
思齊詠歌記周宗之畫美長樂注記述漢氏之懿鑠然後
膺受介福降格永年如川之方至如月之始升九功之
德莫非可歌萬邦之民率用於變臣御名誠懼誠忤稽首
再拜謹言

求直言詔

朕涉道日淺昧於致治政失厥中以干陰陽之和乃自

冬迄春旱暵為虐四海之內被災者廣間詔有司損常膳避正殿冀以塞責消變歷日滋久未能休應嗷嗷下民大命近止中夜以興震悸靡寧永惟其咎未知攸出意者朕之聽納不得於理歟獄訟非其情歟賦歛失其節歟忠謀讜言鬱於上聞而阿諛壅蔽以成其私者衆歟何嘉氣之久不效也應中外文武臣僚並許實封直言朝廷闕失朕將親覽考求其當以輔政理三事大夫其務悉心交儆成朕志焉故茲詔示想宜知悉

賜張方平詔

勅張方平等朕卜用季秋躬行大饗眷乃耆德舊惟輔
臣嘉與協恭共承熙事體茲虛待勉其來朝明當大禮
可赴闕陪位故茲詔示想宜知悉

賜夏國主生日禮物詔

詔夏國主善守世封恪修時貢爰及始生之候載懷永
好之勤寵錫有加壽祺是屆往祇恩渥毋替忠嘉

賜董氊加恩告勅示諭詔

勅董璁卿才雄諸部世屏中區屬吾慶澤之行均爾寵
章之錫毋忘忠順以答恩嘉

賜宣徽南院使雄武軍節度觀察留後判秦州

郭達乞京西一郡不允詔

卿夙練武經久提師律方寄統臨之任坐收綏靜之功
遽閱奏功有殊期待尚勉修於軍務奚過恤於人言汝
惟竭忠朕不忘善

賜夏國主詔

比閱來章願修前誓尋已形於荅諭止申畫於疆封繼得奏陳益嘉恭順方飭邊關之吏具如初詔之文事繁久長理須明審當善處以副眷懷

賜守司徒兼侍中北京韓琦藥物并撫問詔

卿外綏邊服內制河防顧施設之少勞且保綏之多裕使臣之遣藥物是賚勉輔冲和以符眷荷

賜新除樞密副使右諫議大夫蔡挺赴闕茶藥詔

勅蔡挺卿入參機筦載趣封軺惟涉道之良勤宜輔和

之加慎往推頒式當體眷懷

賜河南三城節度使守司空兼侍中判永興軍

曾公亮赴闕詔

勅公亮卿位重公召望推耆哲閑久勞於藩翰其入覲
於軒墀傾佇謀言用符眷想

賜新除武寧軍節度使守司空同中書門下平
章事致仕富弼辭免恩命不允與免冊禮詔

仕而老者吾皆有以榮其歸況在肅括之輔德望功實

較然累朝不有異禮豈稱所以褒顯之意哉已詔有司
為卿停冊往服成命母致重辭

賜淮南節度使守司徒檢校太師兼侍中判大
名府韓琦不允斷來章詔

蓋功崇者宜報之厚勞久者當處以逸古今之常道也
卿弼亮著於三世經營達於四方相圭將鉞皆所以報
也至於官職之勞不能不以累卿者誠有所賴之也勉
體勤諭為朕少安

賜宣徽南院使判渭州郭達謝到任乞京西一
郡不允詔

朝廷擇才武之臣寄疆場之任所以戒不虞也今羌雖
屬和邊未解備訓練綏撫汝惟其能辭難即安豈所望
於卿者其弗復以云

賜淮南節度使守司徒檢校太師無侍中判大
名府韓琦不允辭謝詔

卿辭將相之尊捨別都之重而下求列藩之適朕豈有

所愛哉顧全屬士民被服惠政晏然者累年矣徒得卿
重卧而鎮之卿其濶略細故愛養氣體以副朕倚屬之
意

賜新除節度使守司空同中書門下平章事致
仕富弼辭免致仕所加恩命不允詔

朝廷高止足之風隆勲舊之報所以崇厚薄俗風化於
天下也卿以德則止足也以勞則勲舊也兼是二者以
享隆報孰曰不宜尚毋過辭以廢朕命

賜新除守太傅檢校太師兼侍中河陽三城節度使致仕魯公亮辭免致仕恩命不允詔

朝廷待將相之臣其禮秩寵數皆有成律著在簡策若夫議勲舊之美酌報禮之稱則又有加焉此典制也卿以德義經術弼亮三世於其歸也禮秩之數宜在加等過自損挹非所望也

賜龍圖閣直學士尚書右司郎中知蔡州陳薦待罪特放詔

化之未孚民用不帥犯義抵法聞之惻然勉修教條以厚吾俗

賜皇伯崇信軍節度使知大宗正事宗旦不允詔
向咨耆德內表宗藩方期信厚之風共壯磐維之勢遽
形奏牘曲諭冲辭顧惇叙之有慙豈恪居之為曠勉安
厥位庸副所懷

皇帝迴大遼皇帝賀同天節書

時律均和適當於長養壽觴展慶爰記於誕生沐隣契

之加歡將幣儀而申祝永惟感戢奚究諭言

皇帝迴大遼皇太后賀同天節書

始生紀節永好敦風特枉使華肅將禮意列腴儀於信幣形善禱於壽齡感懌之誠敷喻莫及

除皇伯宗旦制

門下舜叙九族之親實先惇厚周封同姓之國遂底盛強眷言近屬之尊稽用前王之故庸加優拜誕告治朝皇伯鎮潼軍節度使觀察留後金紫光祿大夫檢校右

散騎常侍使持節華州諸軍事華州刺史兼御史大夫
知大宗正事上柱國天水郡開國公食五千一百戶食
實封一千七百戶宗旦德度甚夷才資兼茂襲世緒而
克鴻其慶處貴勢而不流厥心矧自表正宗藩居留使
鎮閱天下之理益為精明推門內之恩見稱友睦爰舉
陟明之典遂旌樂善之風自漢以東惟隨為大錫之瑞
節衍以真封考於舊章特頒異數於戲益戒者處寵之
道鮮失者惟約為然往其欽哉以永終譽可特授依前

檢校右散騎常侍使持節隨州諸軍事隨州刺史無御
史大夫知大宗正事充崇信軍節度隨州管内觀察處
置等使加食邑七百戶食實封二百戶散官勲封如故
主者施行

除王安石制

門下朕考大駕親祠之制蓋為歲必三稽路寢嚴配之
大其成禮者再肆追盛典肅舉精禋賴上下之靈克成
熙事酬左右之助首及元臣具官王安石德蹈中和器

函方大高議足以謀王體純誠足以享帝心惟民式瞻
實朕攸倚刺六經而考制允協厥中總衆職以奉詞不
愆於素仗其忠力成我考名峻階品所以明等威崇表
號所以識功實陪敦多賦流衍真封併茂褒恩式昭眷
禮於戲薦四時之和氣已賴燮諧得萬國之歡心更期
勵翼茂綏吉祿永弼丕基可特授光祿大夫依前行尚
書禮部侍郎同中書門下平章事監修國史加食邑一
千戶實封四百戶仍賜推忠協謀同德佐理功臣勲封

如故主者施行

除韓琦制

門下德可以饗帝者惟聖是克祀至於嚴父而為孝莫先慨予永懷追古成憲結齋佩以致肅莊之慮奉裸主以將明潔之誠禮行不違神其顧享肆廣覃於惠澤茲首暨於英藩具官韓琦忠厚得之天資謨明見於國體相我祖考躋一世於治安帥時公侯為萬國之憲法雖奉璋趨事莫覲於儀形而貢篚克庭有嘉於誠意增錫

表功之號進荒開邑之封厥食以真於命為渥於戲隆
福之況敢專膺受之在予慶宥所加究賴宏宣之及下
尚綏乃衆永厥底止可特授依前守司徒檢校太師兼
侍中行揚州大都督府長史魏國公充淮南節度揚州
管內觀察處置營田等使加食邑七百戶食實封四百
戶仍賜推忠保德崇仁守正協恭贊治純誠亮節佐運
翊戴功臣散官勲如故王者施行

除皇弟願制

門下朕夙除路寢追憲萬靈之廷祇見昊穹參侑五精
之帝遂嚴宗饗克展孝思爰因惠術之行益廣德心之及告
予列位先我同生具官顯稟明哲之資蹈柔嘉之則自
弱齡而有立志處高位而無流心分撫周封外壯犬牙
之勢留朝漢邸近敷麟趾之風越薦鬯之成儀繫奉璋
之有恪宜推光渥以答賢勞進視秩之崇階增表功之
休號多錫之邑用寵厥邦於戲賴辟公之烈文克終熙
事同弟兄之福祿抑有舊章益慎猷為永綏蕃輔可特

授開府儀同三司依前檢校太尉同中書門下平章事
使持節廬州諸軍行廬州宿州刺史嘉王充保信保靜
等軍節度廬州宿州管内觀察處置河堤等使加食邑
一千戶仍賜崇仁保運翊戴功臣勲食實封如故主者
施行

除皇伯從式制

門下朕舉周公嚴配之文致虔於考廟循虞帝惇序之
典均睦乎宗藩矧肆祀之克成繫相儀之有恪式推恩

渙用報賢勞皇伯具官從式體備冲和氣函莊重少遠
綺紈之習長從德義之游飭已在勤奉朝儀而肅恪持
心近厚納閨範於雍和爰因布慶之辰用錫表功之號
陪之多邑衍以真封載渥斯章不顯惟命於戲神降之
福既均逮於羣倫親主於恩茲首加於近屬尚圖厥德
以屏予家可持依前檢校右散騎常侍使持節房州諸
軍事房州刺史兼御史大夫安定郡王充保康軍節度
房州管内觀察處置等使加食邑七百戶食實封三百

戶仍賜推誠保順功臣散官勲封如故主者施行

除康公再相制

門下王者臨四海之廣總萬機之煩仍欲措世於治安
其在求賢而輔助我圖元弼茲得蓋臣錫以茂恩告於
列位具官韓某受才宏博涉道深純智畧足以經遠猷
忠嘉足以任大事而自與謀帷幄正位鈞衡抗論在前
義無曲學宣力於外勞不辭難質於輿言眷乃舊德冠
宰司之重實賴於謨明總史觀之華更資於良直賦之

多邑行以真封併示褒章允為異數於呼百姓尚困惟
在厚厥生遠人未賓當使擾吾化勉輔丕丕之業以成
晏晏之風云云 主者施行

除蔚昭敏特授節度使加食邑制

門下朕昨以仲春戒序初吉在辰躬御端闈式覃沛澤
采章焜耀克展於盛儀貺施紛綸誕昭於鴻慶眷吾良
帥實典衛兵謹申令以有方奉乘輿而匪懈宜頒寵渥
式告明廷忠果雄勇保順功臣殿前都指揮使靜難軍

節度邠州管内觀察處置等使金紫光祿大夫檢校太保使持節邠州諸軍事邠州刺史兼御史大夫上柱國善陽郡開國公食邑四千四百戶食實封六百戶蔚昭敏沉雄邁倫忠厚成性鬱有公侯之表咸推將帥之才而自出遇亨期驟登勇爵鎮臨邊鄙蘊全師保勝之謀拱衛宸居著警夜巡晝之績洎領蕃宣之重載揚旗鼓之威武是中權協於衆望是用薦舉疇庸之典俾申進律之文增食采之真封加褒功之美號便蕃斯在眷注

彌隆於呼賞以勸能既循於成憲忠而奉上宜竭於乃
心服我訓詞勉圖令問可

除王守斌特授節度使加食邑制

門下國家設禁衛之兵所以崇乎武備命良能之帥所
以式是戎昭眷茲勲舊之臣克勵靖恭之節洪惟聖考
夙簡清衷屬當憑几之辰實參交戰之地共推眇質獲
奉慶基言念乃勞豈忘懋賞擇茲剛日聿降命書忠果
雄勇宣力翊戴功臣侍衛親軍馬軍副都指揮使河西

軍節度涼州管內觀察處置等使金紫光祿大夫檢校
司徒持節涼州諸軍事涼州刺史兼御史大夫上柱國
太原郡開國公食邑四千一百戶食實封七百戶王守
斌嶽瀆儲靈星辰稟粹矜嚴成質果敢馳稱早探黃石
之書洞究攘苴之法而自升名勇爵列職和門出護帥
垣樹風聲而服遠入司禁旅謹申令以惟勤戴君之節
彌彰馭衆之才斯見蔚為邦翰茂著時名顧德政之云
初諒推恩而惟允是用授其將鉞俾列於侯藩正彼使

名用嚴於師律仍兼榮於帝保且加賦於井田復益真封併隆異數於呼處萬夫之長董七萃之徒倚任非輕寵光亦至勉圖報效服我訓詞可

賜熊進進馬勅書

勅熊進卿早推拳勇久服忠勞進提衛從之師外領團結之鎮効其名駿登我禁閑載念恪勤不忘嘉歎

皇伯宗旦示諭本鎮勅書

勅崇信軍知軍將吏僧道百姓等朕以宗旦皇籍近親

英藩宿望擇於右地寵以高牙言念彼都之人夙陶乃
聖之化遐承誕告亦允胥歎

賜南平王李曰尊加恩告勅書

勅南平王曰尊朕以季秋上辛躬祀於明廷禮行樂成
神貺具格乃大沛澤暨於朔南惟爾世撫厥封屏翰區
夏勤勞之篤朕所不忘往膺茂恩毋易素守

賜五臺山十寺院僧正順行已下獎諭勅書

獻歲發祥誕辰展慶繼陳勝利來祝壽祺載加輪向之

誠特示頒霑之寵

賜敦睦并祔英皇親等茶藥并傳宣撫問勅書
遠期茲戒終事有嚴屬泮渙之方隆顧哀摧之良苦特
推頒賚其慎保綏

賜護葬使并監護使臣等茶藥并傳宣撫問詔
敕

卿肅將朝命出護宗喪

闕

安之惠

往欽予賜毋替厥勤

建隆觀翊教院開啟皇帝本命道場青詞

天冒羣品不言而曲成神通至誠無體而善應適當元
命再歎真詞舉儀範於靈科備芳馨於嘉薦庶歆誠契
永錫壽臧

景靈宮天興殿開啟雅飾聖祖并真宗皇帝神
御及侍從仙衆了畢告謝道場青詞

伏以夙崇靖館欽奉真遊仰肖像之有嚴飭繪工而加
飾逮於畢事輒此薦誠敢冀靈明俯垂鑒亮

內福寧殿開啟天慶節道場青詞

伏以皇穹眷祐寶命來符紹列聖之欽崇企高真之降格輒儀祕籙按法靈場冀神鑒之孔昭俾帝圖之永固

內中福寧殿罷散天慶節道場青詞

伏以妙道難思蓋高而善應精誠有格雖遠而終孚惟科範之克成顧齋虔之亦至仰希鑒祐垂庇基圖

廣聖宮開啟真宗皇帝忌辰道場密詞本

伏以流景不居諱辰薦極悵白雲之已遠感春露之載

濡恭展孝思具嚴科式上駐九清之駕廣披衆妙之文
冀達監觀仰資升濟

五臺山開啟祈雨道場默詞本

伏以物當長養賴雨以成苟為弗時民則奚望覺皇仁
惻均覆萬生忍視其艱不以慈濟

永昭陵永厚陵十月一日奏告仁宗英宗皇帝
旦表本

伏以四時平運適當飲用之初萬物阜成可備登嘗之

盛恭惟尊謚皇帝崇仁邁古遺德在民超然沛邑之游凜
若軒臺之畏永言瞻慕交極悲摧

內中景靈宮昇永厚陵奏告英宗皇帝忌辰表本
伏以流景不居真游寢遠薦臨諱日徒仰英風恭惟謚
號皇帝

內中奏告立春表本

伏以木德肇興土膏潛震物荷施生之賜民勤布治之
觀屬嗣守於邦基顧無裨於天事徒遵舊典仰達精衷

永昭陵永厚陵正月一日旦表本

伏以斗建於寅在時為首帝垂乎震厥德尚仁恭惟尊
謚皇帝履道協中垂謨裕後舉三朝之會固仰止之無
從望九清之游宣度思之可及永言感慕徒極悲摧

真宗皇帝忌辰密表

伏以開聖並游不返真登之樂遺黎永慕空悲奉諱之
辰備沖式於靈場啟秘文於寶笈上祈神鑒俯慰孝思
內中奏告為春分表本

伏以天時回復春序平分惟仰奉於一元當裁成於萬
化顧茲涼薄豈所克堪式達虔誠尚蒙純佑

永昭陵永厚陵奏告仁宗英宗皇帝五月一日

旦表

伏以薰風從律適戒於盛陽濡露感心空嗟於急景伏
惟尊謚皇帝豐功及物遺澤在民仰流慶於後昆獲承
休於大業永惟謨訓第極悲摧

天貺節內中謝香露表本

伏以景貺下臨實開令節精誠仰薦敢率舊儀竊希乃
眷之仁默下惟新之祉基圖永固民物咸康

永昭陵永厚陵六月一日表本

伏以斗杓改建肇臨未位之初天序平分茲得土行之
正伏惟尊諡皇帝仁功丕育恩澤滂流民懷堯壤之歡
世積軒臺之畏顧惟眇質嗣守成基仰飈御之莫追悵
露濡而增感

西太一開啟祈雨道場默表本

伏以陽氣益驕雨澤且盡精禱備至嘉應未孚怛焉憫
傷不捨寢寐嗷嗷民庶將餒是虞神其降休以塞歲望
西太一宮開啟謝雨道場默表本

伏以時暘有亢秋稼弗滋引領真廷將誠密牘上神乃
眷嘉雨既濡恭按靈科用伸報禮更祈博施普格順成
十月一日永昭陵下宮開啟次薦仁宗皇帝道
場齋文

寒律肇新真游滋遠履寒霜而結慕望佳氣以馳誠爰

舉秘誠式修勝會庶期福佑仰薦威神

後苑瑤津亭開啟粉壇祈雨道場齋文

伏以夏春之交百物茂長雨暘咸失歲望以愆欽惟覺
慈等視羣品尚冀流澤徧此十方

顯聖寺感慈塔為立御篆碑了畢道場齋文

伏以莊嚴寶刹親篆翠珉惟勝事之必成肆法筵之盛
啟所期福祉均逮生靈

後苑瑤津亭開啟粉壇祈雨道場齋文

伏以長養之辰早暝為沴慨然夕惕念此秋成惟大智之博臨閔羣生而下濟精誠以冀善應是期

五臺山開啟祈雨道場文

伏以炎暎熾然請禱至矣嘉應未效憂心靡寧逖思上方實顯勝地就陳法供仰達虔誠庶時澤之普濟俾歲功之卒獲

故贈保寧軍節度觀察留後東陽郡公克聰已下安葬前一日夜共祭

並秀宗藩奄鍾寔數爰詢龜符即寔祭封品物是陳哀
懷茲切

內中御侍已下賀太皇太后年節詞語

伏以明廷頒厯肇開嗣歲之年青輅展祠夙導微陽之
氣恭惟太皇太后得全坤道作合天家惟柔順之風助
成於邦化享寵鴻之祐宜對於神休妾等叨備禁聯幸
依慈蔭前申慶祝倍極歡呼

內中御侍已下賀皇帝年節詞語

伏以周室勤民肇觀於治法漢廷講禮交舉於會儀恭
惟皇帝陛下道繼一元仁函萬彙克大日躋之聖聿新
辰告之猷茂介時祥永綏天祿妾等幸陳下列獲望末
光蹈抃之深悚懇無喻

內中御侍已下賀皇太后年節詞語

伏以斗直寅方帝垂震位歷謹履端之序政施扶弱之
功恭惟皇太后仁隱敦風徽柔秉德膺四海之養克正
於母儀履三朝之期茂迎於天祉妾等備員禁掖託庇

慈闈仰慶休嘉倍增抃躍

賜宰臣富弼已下賀壽星出見批荅

省表具之壽昌之兆見於經躔匪德之隆何以膺此卿等協宣乾化樂致時祥推叙福釐請書諸史勉循故事深愧忠誠所賀知仍依奏宣付史館

錫樞密使文彥博等賀壽星出見批荅

省表具之仰止大象出告壽祺考於太史之占實為王者之瑞卿等情深體國善必推君樂然抗章期以傳信

愛戴之厚嘉歎不忘所賀知云云

賜右諫議大夫參知政事趙抃乞退不允批荅
省表具之卿稟方雅之姿蹈直清之節間以德選外貳
宰司敷造勝之言居多忠益濟從欲之治方賴謨明遽
閱奏封請還幾務雖辭隆乃卿之素志而重外豈朕之所
宜尚期少安庸究遠業所乞宜不允

賜皇伯新除崇信軍節度使宗旦辭免恩命不
允批荅

省表具之朕惟爵賞之行本以旌德苟當其任雖親匪私秉括含和久而益劭信厚之教治於宗藩推叙厥勞錫爾旌鉞當體公義毋至重辭所辭宜不允

賜參知政事趙抃乞退第二表不允批荅

省表具之朕承列聖之緒以撫方夏夙夜業業期底嘉靖實賴二三執政之臣協相以濟而卿乃輕可致之位不以予助更欲遠引以圖藩翰之末効朕之所未諭也其勿復以言所乞宜不允

賜右諫議大夫參知政事趙抃乞退第三表不
允仍斷來章批荅

省表具之朕以卿清靜寡欲有古人之風用酬厥德以
置近列將以厲末俗而矯頽風今興治之始事未就緒
而遽欲辭位以往股肱情哉朕何賴焉君其勉思所職
以輔不逮區區持必請非所望於達者也所乞宜不允
仍斷來章

賜參知政事右諫議大夫馮京乞退第二表不

允批荅

省表具之朕所以託重而任力者一二執政之臣也進退之際非易惟艱卿以端厚開敏升貳機軸嘉猷亮采多所隆益乃欲辭位以去豈朕所以託任之意哉

賜河陽三城節度使守司空檢校太師兼侍中
曾公亮乞致仕不允批荅

古之人雖云七十而致仕至於勲德著艾期所倚用蓋有不得謝者矣卿沉雄之度明審之略宣力左右厥庸

茂焉朕方賴卿老謀咨以賦事而遽欲引年而去豈朕
所以待勲德之意哉

賜河陽三城節度使守司空檢校太師兼侍中
曾公亮乞致仕第二表不允批荅

朕愍以煩務勤我耆德故命解劇藩之政委真廷之領
燕息里第足以造適而養安雖還政之逸不是過也何
嫌而欲上將相印綬遂以去位勉即官次用副眷懷

閣門賜新除崇信軍節度宗旦告勅口宣

有勅卿奮其休德表我近親載嘉磐石之安爰寵高牙之建已從誕告宜即欽承

賜新除皇伯崇信軍節度使宗旦第一表辭恩
命不允批荅口宣

秉德純深奉藩忠謹舉茂恩而申錫顧清議以胥諧宜
略冲辭亟祇表著

賜新除皇伯崇信軍節度使宗旦辭恩命不允
斷來章批荅口宣

內朝之望宗姓所瞻爰陞制閫之權實允在廷之議尚
祇深詔母事終辭

就驛賜大遼賀正旦人使銀鈔鑼唾孟子錦被
褥口宣

有勅卿等遠冒時寒來修歲聘言念勤恭之意不忘嘉
歎之懷特示頒霑往安居息

正旦日御殿賜勞將士

有勅肇開歲序夙講會儀眷拱衛之服勞蒙沍寒而在

位永言忠恪良用歡嘉

撫問守司徒兼侍中判北京韓琦無賜湯藥

有勅卿位隆上衮政治北疆惟肇屆於暄辰宜益綏於
冲履式推頒勞當體眷懷

十二日就驛賜大遼賀同天節使人內中酒果

口宣

有勅卿等奉觴展慶亦既成儀適館勞動所宜加惠往
欽珍賜當體眷懷

賜河陽三城節度使守司空兼侍中曾公亮赴
闕茶藥口宣

有勅卿握節於蕃奉珪來覲方竭儀形之悴尚綏氣體
之和往致常頒毋忘自輔

賜河陽三城節度使守司空兼侍中魯公亮赴
闕生料口宣

有勅卿解符西土稅駕中都載惟道里之遙宜有餽宰
之勞往祇頒式當體眷懷

賜修黃御漳河官員兵士等夏藥兼傳宣撫問

口宣

有勅河之為敗衆力攸殫方屬暎炎倍深軫惻往祇朕
賜母替乃勤

閣門賜新除守太傅依前河陽三城節度使兼
侍中魯國公致仕曾公亮告勅口宣

有勅卿績著仰成行敦知止方引年而謝事宜躡等以
中恩祇服寵嘉往安居息

南陽集卷十五

欽定四庫全書

南陽集卷十六

宋 韓維 撰

外制

內藏庫使慶州界蕃官都巡檢使趙明父故持
禁柔遠寨界蕃部巡檢鬼可贈右千牛衛將軍
勅夫生有陟典沒有贈法於賞勞而勸善一也具官某
父某早以忠順效其才武有子而令能世其勤願加追

賁之恩不忘善述之孝環衛之領勇爵為高用旌爾魂
其告於第

職方員外郎通判饒州王真可屯田郎中差遣
如故

勅朝廷考課之法由在職無過以上皆被遷擢所以勉
人才而進吏治也以爾具官某向以郎選出貳州劇克
有善狀應於陟典乃正厥位以旌爾伐其思褒進之意
益勤廉辨之守可

左司郎中充天章閣待制兼侍讀李受可左諫
議大夫依前待制兼侍讀餘如故

勅夫入直延閣以備顧問出侍露門以參進讀皆所以
敷道古訓啟迪朕志其於事效固不待考而後著也具
官某服道淳固秉心易直被先帝之慎選首充調護逮
冲人之纂服彌見忠益疇其履閱之茂立於諫諍之列
嘉謀至言朕所望於耆德也君其勉之可

東頭供奉官雷周詢可內殿崇班

勅某才武起家勤勞從事能取善最應於陟科俾通殿
城之班且視朝紳之秩勉圖效實以荅恩靈可

前大理寺丞陳元凱將作監主簿范世文光祿
寺丞張德淵太常寺太祝林鼎可並舊官服闋
勅某等三年之喪既除而從政古今之達禮也爾等向
以親恤銜哀去位亦既終制當復諸朝勉思移孝之言
益圖竭節之報可

澶州明公等歸出給空名助教官告一千道

勅某河防之用縣官所急苟能佐之弗褒可乎往服茂
恩毋忘善守可

文思副使李信可左藏庫副使

勅某并代天下勁兵處也爾以才選佐其軍事訓練綏
輯不失其方有司第勞宜在褒陟稍遷使領之重毋忘
職效之勉可

皇姪右監門衛大將軍仲郃可依前右監門衛
大將軍黃州刺史特封齊安公

勅朕按屬籍以觀祖宗之世而陳王之後獨微且其位
不章顯朕甚憐之以爾具官某孝友惇謹善守法度爰
命褒錄以鴻厥慶刺史重任也郡公高爵也遙領紹建
茲謂顯休噫唯務學可以正己惟率禮可以保位汝其
懋哉可

給事中權御史中丞賈黯可依前官充翰林侍
讀學士知陳州

勅朝之近臣朕所優禮入則備臺閣之領出則膺翰垣

之任委屬之重厥惟均哉具官某氣質方厚學術推正
操尚不移於流俗論議有益於當世朕方付以憲司之
綱紀史氏之筆削而引疾來上請藩自便言念誠至可
無俞允俾兼進讀之職往分卧治之寄善輔爾體以及
吾民可

前權知建州節度判官林觀開封府開封縣主
簿蘇惟簡可並大理寺丞

勅某朝廷用舉知之法以觀人才而薦者數輩以爾庶

慎能力有聞於朝子惟汝嘉命進於理官之屬勉卒素尚以對休寵可

殿中丞魏寵可國子博士大理寺丞陳太初可太子中書

勅某等三年之考非有顯勞而後陟也爾等並以幹力列於事守滿歲會課於法當遷益勤所為以圖其稱可職方員外郎劉忱可屯田郎中

勅闕

鹽賴其入以佐常度也汝典領其事皆

有著效賞之不圖能者何勸進官一等遂正郎位其思寵渥之茂益厲忠嘉之守可

比部員外郎張鑑可駕部員外郎虞部員外郎黃延年可比部員外郎祕書丞闕祺可太常博士殿中丞鄭一倩可國子博士

勅某等郎官博士之秩皆高選也爾等夙有風力久從仕綴或丞筦州務以佐其長或專蒞邑政以寧吾俗並膺褒陟之序毋忘庶辨之守可

龍圖閣直學士戶部員外郎知永興軍王陶奏
醫人沈士彥龍圖閣直學士吏部郎中權知開
封府沈邁奏醫人張宗道可並試國子四門助
教不在選限

勅某能以方技效其能力皆由乃帥之薦列於成均之
屬益講善術毋忝休命可

太常寺太樂局七絃琴色色長蘇崇道太常寺
太樂局簫色色長鄭玉可太常寺太樂局副樂正

勅某樂之有正所以審音展器以祗厥事也其思所職
或毋隳度可

兵部郎中充集賢校理章岷可太常少卿依前
充集賢校理

勅奉常之職掌凡禮樂之事貳卿而治者皆顯官也非
清望美實不在是選具官某直諒疏達和而有守以學
術之茂陞在臺閣以政事之敏列於藩服疇其已試之
效宜在當陟之典往服休寵詎煩多訓可

職方郎中石洵直可太常少卿

勅奉常之職掌凡禮樂之事貳卿而治者皆顯官也非
清望美實不在是選具官某以辭藻踐科等以才敏更
事向守由郎選之美用任州符之重而善布條教撫寧民
俗疇其已試之效宜在可褒之典往服嘉寵毋忘厲益可
比部郎中陳益可駕部郎中

勅某郎官古之重任也今雖職事去之而其任序之美
猶為高選爾以才效典城臨民而條教不煩事以修舉

進官一等庸示有勸其思所勉以底於治可

內殿崇班李宗哲可內承制

勅集夫列侍殿墀承傳制旨非肅恪信謹者弗能任也
爾以績效進服厥官其思勤身有以稱職可

職方員外郎蔡準連庠可並屯田郎中

勅某等三年之課不待顯勞而後陟所以勉人才而進
吏治也爾等有文以列於科選有政以服在官守其效
於事厥考惟最命正郎位以旌爾伐勉思褒進之意益

勤廉辨之守可

太常博士劉炳鄭先索儒臣可並屯田員外郎
勅某等廉慎敏給達於從政任職賦事咸以最聞郎官
之貳第進一等其務祇飭有以為稱可

羣牧判官屯田員外郎直集賢院王廣淵可度
支員外郎依前直集賢院充羣牧判官

勅具官某夫郎官有副所以貳職贊事也今雖任不如
古而位序之美猶為高選以爾敏於文故陞在清貫裕

於才故屬之煩使而能慎用刑典參講收政克有善效
應於陟法其思褒進之重毋忘勵翼之美可

太子洗馬致仕楊揆可殿中丞致仕仍如騎都尉
勅其二叔之恩覃及方外況嘗仕而老者可遺之哉官
勲並進足慰家巷其懋承之可

前杭州於潛縣令鄭汝平恩州清河縣令黃萃
可並著作佐郎

勅某等縣令朕所賴以宣化阜民者也勤身從事而無

褒陟之典則為吏者亡以勸爾等庶潔祇慎在職有聞
茲用薦者之言並進位序其堅而守有以自效可

內殿承制李元賓可供備庫副使

勅某夫諸使之貳雖各有分職而御命賦事則惟所屬
非通敏彊濟豈易當之哉爾忠謹自守勤篤不懈能致
其力以克有勞用推遷序之恩且申褒勸之義勉圖效
實毋愧寵光可

堂後官膳部員外郎魏康可如京使

勅某丞相府地密事嚴凡仕於中者非謹信敏給弗能
善也爾以選見用而入無留事出無漏言可謂勤慎矣
擢陞使領實徇爾請其思奮厲以答光寵可

高郵軍錄事參軍前監黃州岐亭鎮茶酒稅監
舜卿可太子洗馬致仕

勅某使之必報之古之道也爾謹身從事以至於老故
於其退命寘朝位所以嘉勤勞而厲廉恥也往服予命
歸安爾止可

中書主事孟應言可堂後官

勅某等仕於丞相府者類必謹潔無過始被推擇況董率其下以趨事辨職者乎爾廉慎祇飭以服厥勞歷年滋多於次當陟其思所以稱其所任者惟恪毋懈可

中書守闕主事董仲尹張學古可並中書主事

中書錄事魏默時士良可並中書守闕主事中

書守闕錄事許元賓張永年並中書錄事

勅某等以刀筆簿書給事宰府歷歲滋久奉職不急會

茲員缺咸以序遷往服光寵益思勤厲可

工部郎中知制誥王安石可舊官服闋

勅三年之喪祿之於家而不敢煩以事此朝廷所以待近
臣而申孝子之情也若夫既除而從政則下之所當勉
也具官某學通經術行應法義銜哀服禮內外竭盡可
謂邦之俊良民之表儀者矣朕臨政願治久矣想聞生
之奇論以佐不逮其悉朕意亟復於位可

大理寺丞高安可右贊善大夫

勅某郊社國之重祀局之有令所以嚴神事而致蠲潔也爾以大臣子能以修飭選以在位不懈其官進承褒嘉益思厲勉可

前國子博士曹振可舊官服闋

勅某三年之喪既除而從政古今之通制也爾勤以奉職謹於為禮銜恤終事當復諸朝勉思移孝之言益圖竭節之報可

職方郎中晁仲綽可太常少卿

勅奉常之職典凡禮樂之事貳卿而治者皆顯官也非
清望美實不在是選具官某世族之後文雅自進靜篤
而能力於事和樂而不流其心比錄當官之勞用推進
秩之典賞以示勸朕所不私忠之為益爾其自勉可

比部員外郎王宗慶可駕部員外郎太子中舍

趙久可殿中丞

敕某庶以飭躬敏於從政在職稱辦會課當遷爰推增
秩之恩以厲首公之節益圖效實毋愧寵光可

永興軍進士巴奕可試國子四門助教

勅某爾講學敦行大臣之所特表予惟汝嘉命進於成
均之秩其帥乃職以經術訓導於鄉里茲朕之教亦其
助可

邵州溪洞融嶺鎮楊昌盟可銀酒監充武溪洞
融嶺鎮勾當

勅某以爾保塞自守奕世有勞錫命於朝臨長所部帥
乃父事毋懈惟勤

前行南康軍建昌縣主簿徐宗臣可大理寺丞
致仕

勅某國朝之制致為臣而歸者必有潔廉之實不絀吏
議乃俞其請爾行則應法老不待年進丞理官足慰知
止之尚往其欽哉可

前內殿承制朱文海可舊官服闋

勅某三年之喪非有金革之事不呼其門所以盡人情
而申子道也爾仕而逢辰喪不違禮命秩賦祿皆汝之

舊惟是忠孝之節愈其勉矣可

澧州慈利縣主簿蔡靖可國子監丞致仕

勅某少而服官老而謝事古之道也爾才足以辦職智足以知止用進丞列以報爾勞往綏壽祺歸教鄉閭可職方郎中馮沆可太常少卿

勅諸寺之卿由少列而上皆顯官也況考正容典協比雅奏其於事守豈不華且重哉具官某履尚夷粹才猷敏茂在官而能舉其職有政以見稱於民校其歲成當以

序陟其恩付畀之慎毋忘報稱之勉可

准本院帖進納空名試監簿

勅某河之敗溢賴焚健以濟應募有輸時乃之力往服
初命毋忘善守可

前守鄜州洛州縣令宋太可試大理評事充天
平軍節度推官知潞州壺關縣事

勅某以敏給之才推擇為令在職稱辦於法當遷列於
賓席之聯付以縣章之寄益圖善治以漸榮階可

故右武衛大將軍化州刺史世肱可贈安州觀
察使追封安陸侯

勅朕承祖宗之訓序骨肉之親生以官列於朝所以綴
恩也沒以爵於地所以申哀也具官某某被服忠厚造
次儒雅在幼而有立志居佚而無流心稟生不庸聞計
增悼茲予贈爾以廉車之華侯印之重尚冀褒渥足慰
營魂可

東頭供奉官楊從先可內殿崇班

勅某爾治邑保塞以不擾聞賞勞之科則惟其舊往服
殿墀之列且視朝紳之榮當體茂恩益圖來效可

給事中充天章閣待制彭思永可依前權御史

中丞充理檢使

勅御史大夫官廢久矣惟中丞實長其府事非操行沈
雅可儀於人論議剛明不阿乎世者惡能勝其任哉具
官某質厚而有守和樂而不流器能足以任重風迹可
以起頑往持御史之筆見稱簡直薦分使者之節多所

效正夫入拜瑣闥於古為重進長憲府如前之審歷選
於衆無以易汝朕欲紀綱之振修號令之明慎而疾夫
流俗之人襲苟簡以敗官懷阿倚以事上爾其為朕督
察以時繩舉尚俾予治毋愧於前人之休往其懋哉可
前瀛州防禦推官充魏王宮大小學教授公乘
高可大理寺丞

勅某有賓畫以佐於幕府有儒術以擢佐藩邸所任輒
辦於法當遷進參理官之屬尚專幼學之教善率乃職

庸對朕恩可

文思副使內侍押班王昭明可右驎驥副使

勅某夫入侍軒墀帥屬以祇事出守疆場提兵以禦侮
非吾信謹之臣不以任也爾夙尚忠固兼資才武在職
不懈有勞當遷稍陞使領之華尚仍邊守之舊益茂乃
績毋忝朕恩可

樞密使淮南節度使兼侍中文彥博曾祖崇遠
贈太師中書令兼尚書令邠國公特追封韓國

公餘如故

勅闕

輔臣始拜率禰而上至於魯廟咸有闕

褒典緣情昭孝禮莫為重具官某迪闕

真

履潔高位盛祿不在其身陰功隱施闕

厥後肆乃

孫以碩德宿望登冠樞近茲率闕

進爾以大國之封九

原而知尚其歆服可

文彥博魯祖母追封越國太夫人宋氏可特追

封韓國太夫人

勅德厚者流光德薄者流卑古之義也今吾股肱之臣
宣服寵以克有廟而祖妣之贈不厚何以昭國典慰孝
思乎具官某曾祖母某氏蹈履柔則章明內治動必中
禮粲然環佩之節居不忘戒鑒茲圖史之訓韓之為樂
詩人所詠相攸啟宇尚或歆之可

大彥博祖銳贈太師中書令兼尚書令齊國公
可特追封吳國公餘如故

勅朕惟賢賢之道在任人故有延登之拜親親之義貴

尊祖故有追賁之封非吾異恩孰備茲禮具官某祖某躬蹈吉德時稱茂士非仁義之術不以宅心非清白之訓不以貽後予之元老爾之令孫方冠握機之司宜厚泝源之澤俾以舊秩啟茲大封是惟顯休足慰冥寞可

文彥博祖母追封秦國太夫人王氏可特追封
吳國太夫人

勅朕眷遇之禮隆於近臣賁飾之恩逮其皇祖乃惟齊

體之重實均有後之慶茂典或闕營魂何慰具官某祖母某氏生稟柔懿動循法度深明治內之則休有宜家之問魚軒之寵顧平生之莫及駟車之慶至奕世而後顯進啟大國足慰幽泉可

文彥博祖母追封魯國太夫人郭氏可特追封
陳國太夫人

勅朕緣適臣之義厚大母之親生也有以榮之沒也有以恤之所以昭寵典而申孝思也具官某祖母某氏

明括靜嫔自閑以禮潔繁俎而申薦有嚴宗事佐蘭陔之就養克成婦道善慶之報久而益大陳古之建國也茲茂予渥以顯爾魂可

文彥博父洎贈太師中書令兼尚書令魏國公
可特追封周國公餘如故

勅生有爵命之數沒有贈飾之典其義一也今夫人臣砥節厲行而恩不及其身飭躬揚名而澤不逮其親則在位者何勸焉具官某父某忠肅端厚矢公不懈歷踐

衆職咸有顯勞遠業未究以致殄瘁先人之慶至子而發其於追賁之典可謂厚矣雖秩位已至而國號未稱其以周之故地啟公之封以昭積德善教之報焉可

文彥博嫡母追封魏國太夫人耿氏可特追封

周國太夫人

勅夫鼎茵在列不逮養之為難霜露履節未思哀而已感情之常也況我哲父之老夙厚誠孝之性不有茂典何以慰其心乎具官某嫡母某氏挺柔婉之質秉幽閑

之操動得家節言成婦則克配君子穆如琴瑟之和篤
生令人蔚為廊廟之器茲舉徽數用錫美封尚歆乃恩
永配在位可

文彥博亡母吳國太夫人申氏可特追封秦國
太夫人

勅朕欽命元老屬圖幾務言念禰宮之配新捐子舍之
養漏泉之澤方自茲始凱風之思宜有以慰具官某亡
母某氏惠問蘭馥柔情玉潔蹈女則而姆教不煩率婦

道而家聲自正列鼎之奉歡方等於榮祿共牢而致祭
俄欽於象服茲舉成國之法以重小君之號往告於第
尚顯厥靈可

南陽集卷十六

欽定四庫全書

南陽集卷十七

宋 韓維 撰

外制

都官郎中史瑜可職方郎中

勅某郎官古之所重也今雖職外徙而位序之美猶爲
高選爾體局夷雅才姿敏茂出治州劇事舉民和有司
第勞叙進其秩祇對褒渥毋忘勵翼可

開封府界提點諸縣鎮公事祠部員外郎充秘閣校理孫坦可度支員外郎依前充秘閣校理差遣如故

勅具官某夫館閣之臣以文學選而州郡之任由幹用進參而委之所以盡人才而濟治道也爾辭藻自奮風力兼劭出撫州部政效著聞入按都畿職事修舉朝有第勞之典爾宜進秩之拜往服休命益講善猷可

太常博士羅愷可屯田員外郎

勅某郎官有副所以貳職贊事也今雖任不如古而位序之美猶為高選爾辭藻自奮幹力兼邵所職輒辦有勞當遷往服褒嘉之恩毋忘勵翼之美可

除名人丁鈞可檢校水部員外郎充楚州團練副使簽書本州公事

勅具官某朕宣布慶澤至於幽遠罔不畢逮况當仕而顛者豈可遺之哉爾前以不謹犯吏議甄叙有典修省無忘可

刑部詳覆官前守慈州鄉寧縣令朱溫其可大理寺丞依前充職

勅某爾以經術之學刑名之習選以試職詳慎有聞茲予命汝以理官之丞往即舊服其悉乃議毋爽厥中可
中舍致仕裴禹錫可殿中丞致仕

勅某郊祀之恩覃及方外况嘗仕而老者豈可遺之哉爾謝從政之勞享知止之尚進參盾省足賁家巷往其
欽哉可

前信陽軍錄事郭允恭可許州別駕

勅某爾勤以服官老而謝事進領別乘足慰知止之心
歸安而家母忝予命可

河北轉運使兵部郎中沈立可太常少卿差遣
如故

勅奉常之職典凡禮樂之事貳卿而治者皆顯官也非
清望美實不在是選具官某體局夷雅才資敏邵入參
司會之領見推肅慎出分將漕之任以時趣辦課之來

上法當遷序用進華聯俾仍舊服其圖忠益之效以對
褒陟之典可

太常少卿權知壽州王端可光祿卿知壽州

勅九卿之任亦重矣所以上佐天子統理衆務以成化
阜俗者也今雖事去諸寺而位號之美猶為高選具官
某儒雅自奮風力兼邵參綜銓筦出領州郡而能甄收
有法條教不煩錄德第勞宜在褒陟茲用進爾以光祿
之秩往即舊服善撫吾俗毋替乃勤可

故內侍省內東頭供奉官李用希可贈供備庫

副使

勅某謹信自持勤篤匪懈被恩未拜遭命不融嘉乃似
續之言錫茲賁褒之典升貳使領足慰爾魂可

彰信軍節度使檢校太尉同中書門下平章事
判許州張昇奏亡母劉氏親侄劉鼎可將侍郎
試將作監主簿

勅某朕均布慶澤加異輔臣奏任之科通內外族之請

汝以修謹進服厥恩勉於廉辨稱是光寵可

降授守少府監沂州陳古可光祿卿

勅夫忘人之過記人之善古聖王所以博盡材以成天下之務也朕甚慕之具官某雅有才邵久宣忠力間由使者之任往承帥臣之乏而不咸之議興於乃僚無實之語暴於予聽用置於理俾思厥咎朕宣布慶澤追念舊勞命復官次之華升莅藩維之重毋怠初守以對寬恩可

景靈宮使保平軍節度使同中書門下平章事
曹侂妻普安郡夫人張氏可進封崇國夫人

勅朕成祀郊丘均慶方外乃眷外家之戚既命諸朝爰
洎中間之賢亦榮於室具官某妻某氏性資沈嫻體度
閒和夙蹈圖史之規不煩姆教躬羞蘋蘩之薦休有婦
儀雖湯沐疏封副笄錫服而言德滋茂位號未充其開
徹國之恩以懋宜家之美往服褒寵詎假訓言可

國子博士种諤可左藏庫副使殿中丞种諤可

洛苑副使

勅某等爾父世衡智略威信有古良將之風朕遣使行邊詢求其後而諤洎診咸以才武克嗣其世子惟汝嘉並進於諸使之貳分護兵屯若夫服喪之制則金革之事所不得避也善繼乃父之志勉卒功業高爵厚賞朕不愛焉

兩京左藏庫副使譚德潤曹偃可並文思副使
文思副使宋繼垣可左藏庫副使

勅某等朝廷甄叙才能參幹事局考覈切最曲備科條
務為不私以示有勸爾等學通軍志躬服吏廉或給事
禁局見稱謹信或列職邊部夙著勤勞並推進秩之恩
益茂圖忠之報可

前永州東安縣令柳天經可大理寺丞試秘校
前權知楚州團練判官侯叔獻可著作郎

勅某朝廷謹銓綜之司以校吏勞明舉任之法以通人
才憫焉惟士大夫失職之為憂而爾之功狀實在陟典

往服厥位其思所勉可

都官郎中李顏可職方郎中

勅某郎由正員以上皆顯官也今雖職事外徙而位序之美猶為高選爾雅自修飭敏於施設任職從政咸以最聞有司第恩叙進其秩祇對褒渥益厲乃勤可

職方郎中楊仲元楊中可並太常少卿

勅某奉常職業之華貳卿位序之重非進以文雅服在清要者蓋不以授焉爾早列士林寢更郎選治迹之敏

得之民言課等之優達於予聽不有褒陟何慰勸勞毋
薄平進之恩益勉方來之效可

屯田郎中判吏部南曹李孝孫可都官郎中差
遣如故

勅某文昌諸曹之務率外徙他局而存其法者惟吏部
為多爾以名家子實貳其政而甄叙考核不失其平第
勞進官則有舊典往服厥位毋替乃誠可

閣門通事舍人王光祖可西染院事使兼閣門

通事舍人

勅某夫典視省闈之儀臨糾畿服之政皆時之顯使也爾惟詳練故鮮違禮惟敏給故靡留事歲比其課予嘉乃勞升聯貳使之華益思官守之恪可

利州路轉運使司封郎中楊寧可太常少卿差遣如故

勅某奉常職業之華貳卿位序之重非進以大雅服在清要者蓋不以授焉爾早列儒科兼資吏幹臨長州部

條教不煩佐治都畿獄訟無枉茲舉官聯之峻用增使
領之雄往服茂恩益圖善最可

司封郎中充秘閣校理判登聞檢院林德可太
常少卿依前秘閣校理差如故

勅某九卿之貳皆顯官也而奉常職在禮樂於務為大
故選授之體又加重焉爾志尚恬約文辭敏洽典校篇
籍是正居多使治章政幽遠畢達覽善課之來上舉華
聯而副駕往服褒陟毋忘勤厲可

江南東路轉運使尚書祠部郎中充集賢校理
王哲可尚書刑部郎中制

勅某朝廷於官吏之升陟金穀之登耗惟部使者之為
聽其於倚屬可謂厚矣爾以春秋之義銜命於外而賦
事行政亟以最聞予惟汝嘉命進於刑司之屬往節舊
服毋懈惟勤可

邕欽州沿邊溪洞都巡檢內殿崇班姚明可內
殿承制

勅某邕管地接蠻徼且有瘴癘之虞爾以服金革督盜賊為任可謂遠且勤矣故朕憫然增秩

光祿卿知壽州馬從先可秘書監差遣如故

勅天下無事羣臣奉職以累曰課者皆至大官朕於士大夫可謂無負矣具官某仕以儒學名有吏幹操尚不移於廉約風績尤彰於惠利最等來上茲用汝嘉秘丘之秩雅號華重往服厥位其知所稱可

比部郎中董壽可駕部郎中駕部員外郎于覲

可虞部郎中屯田員外郎上官凝可都官員外郎太常博士林英可屯田員外郎國子博士李存賢可水部員外郎比部員外郎楊希元可駕部員外郎

勅朕憫官職之勞而慮才者之久鬱於外也故命有司比三歲之課而序升之爾廉端之實見於行已敏給之問發於臨政進位一等以示有勸若忠與勤則爾之所自勉也可

武康軍節度使李端愿奏醫齊居明可試國子
四門助教不拘選限

勅某助教儒官也爾以方技之學進服厥位惟慎而恪
以克欽荷可

皇兄右驍衛大將軍雷州刺史宗暉可懷州團
練使皇兄右驍衛大將軍白州刺史宗輔可磁
州團練使皇兄右驍衛大將軍瓊州刺史宗袞
可温州團練使皇兄右驍衛大將軍連州刺史

宗晟可光州團練使皇弟右驍衛大將軍滕州
刺史宗博可楚州團練使皇弟右驍衛大將軍
龔州刺史宗瓊可真州團練使皇弟右驍衛大
將軍橫州刺史宗愈可饒州團練使皇弟右驍
衛大將軍汀州刺史宗隱可隰州團練使皇弟
右驍衛大將軍漳州刺史宗綽可虢州團練使
勅昔堯親九族舜惇叙之化流於天下朕甚慕焉具官
某某稟明哲之姿服信厚之教志尚儒術克有成德躬

蹈禮節訖無流志惟休嘉之問滋著而褒顯之義未稱
其陞團練之領用壯盤維之望益務忠篤以承休顯可
皇兄右驍衛大將軍洺州防禦使宗誼可明州
觀察使

勅夫親之欲其貴愛之欲其富古之通道也非屬近而
德備者疇克當之哉具官某英茂夙成淵和自得躬大
雅之明哲為宗室之表儀內竭忠純參翊龍興之運旁
推信厚雅符麟趾之風位之未隆情則非稱宜上衛軍

之節進升廉使之車噫處高而不危在寵而益戒時乃素尚詎假訓言可

皇弟右領衛大將軍宗治

原宗蓋
階宗勝
丹宗

楚復宗祐邵可並逐州刺史

勅國家席靈長之慶享衆多之祥乃茲宗藩並成德器不有崇陟之典曷明惇叙之厚具官某卓爾而才溫然其氣參內朝之崇式壯表儀服諸衛之聯寢更時序宜舉展親之典俾陞刺部之榮茂對渥恩益勤忠履可

皇子行太子左清道率府率宗漢可右驍衛大將軍

勅朕承祖宗丕顯之業嘉卽第蕃滋之慶宜有渥典時先茂親具官某務學向方服善知訓溫懿而成裕淵厚以凝姿率職官方未優於敦叙陞榮環列用示於褒崇無忘慎修以荷成命可

皇兄右驍衛大將軍濮州防禦使宗肅可和州防禦使

勅朕惟前世敦叙宗族屏翼邦家所以教民睦而篤親
惠也式布寵命以光戚藩具官某稟信厚之風動而慮
善躬淳良之行慎而履謙薦更武衛之勞早奉內朝之
例爰舉茂典載甄雅猷俾正秩於戎防示承休於廟慶
噫褒陟之典既朕有加寅恭之誠惟爾無廢乃服厥位
勗哉自勤可

皇弟右驍衛大將軍道州團練使宗翰可依前
右驍衛大將軍德州防禦使

勅朕奉遵鴻緒思展茂親載隆褒進之恩式洽糾綏之
美具官某蹈和襲慶迪美知方陟環尹之資內聯朝位
峻軍團之命外假使麾疏寢寵蕃率履彌謹爰增防遏
之秩用示懷柔之仁往儀圖之以稱我寵可

前行汾州團練判官傅天翼可著作佐郎

勅某議者以仕進之廣濫也故謹銓叙之佐而艱其升
擢之路爾克庶辨以無罪悔第叙勞進秩則仍舊典當
體慎澤益圖忠服可

屯田郎中知筠州董儀亡兄俛可贈試大理評事

勅某爾之弟儀不忘訓撫之恩納所當遷以易贈典朕嘉爾之能友其弟而儀之所為協於悌順故以理官之秩加貴泉隧尚有知者其榮享之可

守温州瑞金縣尉丈勛可特授處州縉雲縣令勅某盜發不得有常罰獲者顧可以不賞歟縣令朕之所重也爾以勞處其知自勉可

故左屯衛大將軍致仕綦仲宣遺表男前供備
庫副使綦元亨可西京左藏庫副使

勅某朝廷錄仲宣之勞沒而不忘爾嗣其世以亨休寵
善帥喪制往安而家益思移孝之圖且為從政之報可
太常博士俞瑊可屯田員外郎

勅某仕以辭學名有幹力間緣廉按之舉遂罹誣誤之
文頗淹歲期未進資等朕惟觀過有道舉材為先擢貳
郎員式旌課吏往服褒嘉之渥毋忘愍慎之思可

尚書祠部郎中杜千能可依前充三司鹽鐵判

官

勅某舉山澤之入校軍國之用而鹽居其多則貳職贊
事以登司會之府者其選可以不慎哉以爾知略明具
才資穎發宣布民治蔚然有聲按平刑章大無以害若
夫移敏給之用厲飭勤之意以商利者豈不裕哉往祇
厥官毋忘而守可

崇儀副使王漢卿可左驍衛將軍致仕

勅某度才而受任量力而知退士君子審已者之為也
爾克蹈之斯可嘉已升冠衛軍之領往從鄉閭之遊式
旌久勞且慰冲尚可

皇叔故右神武軍大將軍鳳州團練使承嘏可
贈安州觀察使追封安陸侯

勅親之俾其貴故有爵命之大沒則申其哀故有贈飾
之典此先王所以立愛自近而成化於遠也具官某襟
度冲雅才資茂美躬服睢麟之化信厚夙成日虔翔鳳

之朝飭勤匪懈天不慙遺朕用盡傷祿以庶使之章齒
於通侯之籍尚有知者往其欽哉可

侍衛親軍馬軍副都指揮使起復雲麾將軍賈
逵可金紫光祿大夫利州管內觀察使侍衛親
軍馬軍副都指揮使

勅出處之端斯可見事君之道予奪之柄亦以謹馭臣
之方我推茂恩國有彛制具官某稟剛嚴之氣挺明果
之才訓士本於在和料敵長於應變向罹陟屺之戚勉

服衽金之勞外摠戎昭故特假將軍之號內申孺慕茲不忘孝子之心逮奄畢於終喪宜一還於舊秩往欽渥典益厲精忠可

皇兄右屯衛大將軍克愉可依前右屯軍衛大將軍昭州刺史

勅朕承祖宗之憲厚骨肉之親命官而不責以事所以全愛也計考而叙進其秩所以示寵也具官某襲是慶善挺然秀穎幼服仁義之訓遂為全人入循孝弟之規

靡有過事宜即衛軍之領進兼刺部之榮當體渥恩益勤令德可

皇太后親堂姪供奉官曹諷男昉皇太后親姪西京左藏庫副使曹談男暉可並特授將仕郎太常寺奉禮郎

勅某朕致孝慈闈加惠戚苑乃眷忠勞之裔雅多翹秀之才匪推茂恩奚示隆禮升備容官之屬益昭世闕之光勉勤令猷毋替淳則可

淮南江浙荆湖南北路都大發運使右諫議大
夫馬仲甫可依前右諫議大夫充天章閣待制
高陽關路都總管兼安撫使兼知瀛州軍州事
管内勸農使

勅天章處禁垣之秘蓋本朝隆儒之職高陽負邊關之
阻實前世用武之地疇若二任我圖兼才具官某學問
疏達幹力適舉間咨試可之效薦付使委之煩而馳傳
所至列城之治為修汎舟而上中都之用以給朕惟訪

對之任重綬御之才難輟於南服寄以北道噫簡而嚴
可以振驕情寬且惠可以安疲羸毋狃於常以易而守
可

尚書祠部員外郎知制誥知諫院兼判司農寺
邵亢可依前尚書祠部員外郎知制誥兼太子
右庶子

勅太子國之本也本正則國安矣若夫明德義以漸其
美陳法度以弭其過使言動注措一入於正者非爾左


右贊翊之臣乎具官某學問通經術論議明國體率其
素修之善見於充蹈之實入備藩邸使吾兒有仁孝之
名進登諫列勉朕舊闕

惟納忠告於不回曰正與安將爾是託爾其懋哉可

穎王府翊善齊恢可守尚書左司郎中依前直
昭文館兼太子左諭德諸王府記室參軍尚書

司封員外郎直集賢院陳薦可工部郎中依前
直集賢院兼太子右諭德

勅唐制左右諭德掌諭太子以道德其內外庶政有司
為規諷者隨事而贊諭焉則官其官者其選可以不重
哉以爾恢清慎廉正不失其常以爾薦質直篤厚可以
任事而或入道經訓或贊為書記使常有懋聞繁爾能
力屬儲闈之聲啟擇郎曹而並登夫語道者非序而安
取論德者惟行之為勤毋或易言以墜予訓可



南陽集卷十七